



JANUARY 2021

HINNA VÂK

Monthly Christian Magazine

AN ORGAN OF THE MPCs MANIPUR AREA

SUA PAT KUM MARCH 2008



PILVANG TAKAH HINKHUA MAT

- Bible Mang Phachuam Hitiu
- Jochebed Pauchapna
- Khanglai leh Kawppi Hawl Ding Dante

Editorial, Sermon, Kochuam huang, Khanglai Huang, Programmes etc.

To,

IF UNDELIVERED PLEASE RETURN TO

Manipur Area Office
P.O. Box - 107
D. Phailian
P.O. Churachandpur - 795128
Manipur, India



Pathian kochuam a thisan ah a lei te,

Kumthak eipui gâlkaitu i pau Pathian min in kumthak chibai ka hung buk hi.

Tukum 2021 Synod Pastoral Committee chun Pastoral ministry thupi ding in “**Nun fimkhur**” ti chu mat zui zel ding in a tel kit hi. Kum lui hun sung zosia kha hipi len ziakin Nun fimkhur chu mang phachuam in natna chuam chuam apat ei venbit ban ah mihing pul ti khawp ah a gen uh corona virus lak ah patin venbit in i um ua, kumthak kipak takin i lawm thei uh ahi.

Tu hin i khawpi sung leh a sevel ah thawm gi dawi umlo takmai chu **gang group** chuam chuam kisual thawmin, chanchinbu te a hung lua in nu leh pa te holimna ahung kitheng kit tai. Mithiam te chun **history repeats** a tiu a, Bible ah Thugentu hinle thil umsa ma kha hung umkit zel ahi dan ei gen hi. Malai ah i pi leh pu teu chun thitha sangak ala lau ua, zia nung a chun gal alau kit ui. Ka naupan lai ah Lamka chia ten a lau pen uh chu Hiangkot tang ah gunda ten a suam khak diu ti ahi. Hun chomlo kalin gunda a hung bei ah, meithal chawi te lau hun a hung tung ah, zia chule awl ah hung dai hiai hiai in Gang party a hung ding kit hi in a lang hi.

A hun in a pei daw gual ah ngaiin i etliam diu ahi diam? Nam puitu leh philanthropic organization te i set mai diu a diam? Kochuam te, kristian sungkuan tin ten pan la thak hi tiu in Nun fimkhur kum ahi ti he zing in eimau insung chiat kaitup gua leu hen ti hi kumthak ah ki chialna masa pen uh ahi. Lalpan nun fimkhur mang thei ding in hung umpi ta hen.

Rev. S. Lama Vaiphei
Editor

Kumthak thucha

PILVANG TAK A HIN

Bible chang: Eph 5:15

“La um danun pilvang un”

-Rev. R. Lalhmingsanga, AS

Ningkum 2020 khan Pastoral Ministry thupi ding in Synod Khawmpi chun ***Pilvang tak ah hinkhua mat*** ti a tel a. Maleh, Covid 19 ziakin i kikhawm mumal thei puau a, zia thupi hi le sermonna ah mat tam man a hi pua’i. Zia ziak chun Synod Khawmpi ma in kum a hin le thupi dang tel loin ***Pilvang tak ah hinkhua mat*** ti thupi ma hi mat hi hen tiin thupukna a siam ta ahi.

Zia thupi hi a tak ah i lawkpi na ding leh i lawtinpina dingun kochuam tinin sermon thupi a a tam thei pen i mat uh a pawimaw hi, Pastor ten le bial fan hun ah zia thupi hi mang sek leu hin pha ma ma in a.

Pilvanna dingte: Pilvanna ding lampi chuam chuam in gendi tam ma ma in a. Mimal leh sungkuan tinten le i nisin hinkhua matnau a i pilvan diakna ding uh tam tak um in a. I nek hawlnau ate, cha leh nau etkawlnate, i thil chin uh chuam chuam (Life style) te leh i hinkhua mat dan uh chuam chuam te hi, tu sang ah masawanna ding um maithei a hi. Thil phalo haisan ding i nei maithei ua, thilpha sepzawm ding le kinei ma ma in a.

1. **Nek hawlna:** Nek hawlna lam a hin mi a lawting thei ma mau ah, i lawting nau em? Bang ziak a hi diam? I taimat lo ziate, hun i mat thaimlo ziate, i thawkhat zawlo ziate a hi mai diam? Pathian zalin ti bukim in i piang a, mite gual in khut le keng i nei kim chiat ua, mi a lawtin thei chun bang ziak in em i lawtin lo ding?

2. **Insung chenkawmna ah:** Sungkuan a mite hin chenkawm dan i thiam a hi chun insung nuam pen i siam thei hi. Sungkuan ah mi kua a hem pen insung ah le um peilo, khawlai pawt zing mi i hui em? Eima insung ah, i thisan kizawppi te tawh chenkawm hi bang ziak ah nuam tilo mai i hi ta diam uh? Nupan le

bang ziaak ah ki tuaklo? Isung khawsak khawmna nuam tak ah siam hi i mawpuaknau a hi. Kum thak a hin insung nuam siam dingin pan la thak hi ti'u. Ei suse thei thil chuam chuam mani masialnate, chaponate, duamna te, huanate, kingaisanna te, kinial buaina lak leh thil dang dang ah patin sungkuan hi pilvang hiti'u.

3. Nek leh dawn: Nek leh dawn lam a hi i pilvang ua, chingthei tak ah i um hun a hi takzet tai. Nek lo ding tam tak i neu a, dawnlo ding tam tak i dawn ua. I taksan a mamawte hi bang bang te a hi hui em ti ngaitua ah nêk leh dawn ah pilvan a hun takzet tai. Natna mak tak tak tumalam ah ei subuai ngailote khan ei subuai tau a. Heart attack leh stroke te hi a tam ta khawp mai a. BP sang, zun thum leh natna tam tak, i pilvan lo ziaak ah i thawk a tam ta khawp mai hi. Pilvang zel hi ti'u.

4. Taksa kisawizawi (exercise): I taksan a ma maw dan ah exercise lak hi mithiamte chun a ngai pawimaw khawp

mai ui. Tulai a hin nuam i sa tau a, i nek leh dawn le a tui deu deu a. Taksa gim tak leh chawl tak ah semgim lo ah nek hawl dan i thiam deu deu ua. Chut kawm ah nasep thei Office na te, dawr ngak te, sumdawmna chuam chuam nei i tam ta. TV, computer leh phone khawi a hun sawt tak tak chu sekte le i tam ta khawp mai u'i. I taksau hin hiselna ding in tawi lumlet vel a pawimaw a, i thei dan dan in nisin exercise lak hi habawl hi tiu.

Pathian na lopi tak i sep theina dingun taksa hiselna i pawimaw ma mau a. Taksa hiselna bakin lungthim hiselna le i pawimaw ma mau hi. Lungthim diklo leh chawl tak pum a chun Pathian a ding a mi phachuam tak a hi thei puai. Zia ziaak chun i nisin hinkhua mat dan (Life style) hi bang a hem ti ngaitua sek leu hin, san danglam ngai a um em? Hiselna pha i neina ding in i nisin hinkhua mat dan a hin pilvang zel hi tiu.

La um dan in pilvang in

BIBLE MANG PHACHUAM HITIU

-Rev. Summinlian, Delhi

THUMAPUI

Bible kiti kampau hi Greek pau ah chun ‘*Byblos*’ ti ahi. Zia chu *Lekhabu* ti na ahi. Gingtute chun Holy Bible ahem, *Lekhabu Thiangtho* hem iti chuam bik sek uhi.

Bible hi Pathian thu ahi’n, mihing zosia a ding ah hukdamna lampi kithung/kisiam chu ahi. Johan 14:6 na chun, “Kei ma chu Lampi, Thutak, leh Hinna chu Ka hi, Keima ti lo Pa kiang zawtna lampi dang bangma a um puai.” Chun, Johan 6:35 na chun, Jesu’n keima hi hinna vaithum chu kahi, ka kiang ah hung tapo chu gilkiat kit tapuan tin, keima eitaksang ah ei ging tapo chu bangma tik in dang chak kit ta puan ah.” Chuleh, zia hi a gen be hi; “Zia hi Ka Pa van ah mi daw gual tak chu ahi, kuale Chapa mu ah ging cha chu hinna nei in tin chuleh, nitawp ni tak leh kei ma’n kaitho ing ka” ala ti ahi (Johan 6:40). Zia gual ah gingtu nun leh hinna chawmtu, kinepna hing musak thumal kizik na leh kamsuak hung kipatna chu Bible hi ahi.

DAWTNA LIAN TAK LEH NGAITUA KHAM TAK CHU ZIA HI A HI:

Q. Bible hi, hukdamna thu achuang ah, van ah Pa kiang ei tut theina ahi chun, gingtu ten titak zet ah I zil leh hiatchian ah ngaituana thuk zaw diak ah I suichian ding ua thilpha hilo ahem?

Timothy thawt khat na chun, Lalpa Pathian, ei

hukdam tu’n mihing zosia hi’i hukhinna chang chiat ding in ei dawisak a, thutak in ama ei hiatchian sak hi ala ti ahi. Lalpa Pathian chu pakhat ahi’n, Ama tawh mihing kikal ah palai pakhat bep a um a, ama chu Jesu Khrista ei uh a ding ah hung kipia a manpiak ah ei chawdawk tu chu ahi (I Timothy 1:4-6).

Zil mite chun, Bible ‘*Byblos*’ thuzik hi Pathian

kamsuak ngei ei puai ala tiu ah, ahin Pathian thupiak/thutiam a keng tel hi ala tiu hi. (The Bible is not the words of God, but it content the words of God) Zia umzia chu, Bible sung ah thumal kizik zosia hi'h Pathian in a chutpi det det ah mi pakhat azik sak gual ahi puai ati nawpna ahi. Islam sakhua zui te'n a lekhabu thiangotho 'Quran' hi a pathian 'Allah' in angel 'Gabriel' mangcha'n Zawnei Muhammad kiang ah chutpi det det in aziksak gual in agen uhi. Ziaziakchun, Bible hi Islam sakhua zuitute gual ahi puan, Pathian thuhing hukdamna thu akengtel a, thilsiam zosia hukhin na ding ah kizik *Lekhabu* chu ahi.

Q. Bang gual in Bible thuken te chu hethiam a, he chian thei ding ihu em?

Jakob lekthawt 2:22-26 na chun, Thagau pang lo in taksa chu a thi ahi; ziagual ma chun, thil hi pang lo in ginna chule a thi ahi. Ginna chun nasep tawh a semkhwam a, nasep zia in ginna chu a bukim ta ahi. Ginna zia ngawn hilo in, a nasep zia

zaw'n, mi'n thiam a chang sek hi, ti i he tau hi.

Gingtute hin, Bible sim chimchak him him loding hi'i i mawpuak nau pakhat ahi, Khawvel ah I khawsak nau ahin taksa leh thagau ah khan leh chawndan nei ah khawsa ihi zing ua, zia dung zui ah umlo leh panglo te chu mimawl (un civilized) leh hina (identity) neilo ati sek ui. Nam khan leh chawn (custom and culture) ding dan hi'i, inchen lochen khawsakna khua leh tui hina hechian te bep in Nam piting, nam changkang, khua sung jemhawi tu leh chawihawi tu ti'n ihesek ui. Zia gual achun gingu te hin, I Bible hi'i matphat chuam pi thei na ding a um ahi chun taksa leh thagau ah khan leh chawn ding dan iki zil thiam ding uh hi I thupi in a dawu chu ahi.

I nam khan leh chawn dan i et ahi chun, abik in ei thingtang mi te'n I chîndan leh chiapidan (tradition) hi'i, Bible ah Pathian in a namtel Israel chate a etkawl dan tawh kibat na tam tak a um hi.

BIBLE ZILTILNA

1. Patriarch (Pawsal luchang pen) – Bible apat thuzik kimu dan in, Numei kiang ah chun, la nawpna chu la pawsal lam ah hi’ntin; la pawsal in la chung ah thu nei zing in a, ti’n i mu ahi (Thilsiamthu 3:16). Zia chu Israel chate gual ah pawsal thuneina ah, pawsal luchang pen hi’n tin, Inchen lochen, khawsak leh Inkuan etkawl na ah, a luchang pen (head of the family) leh enkawl tupen mawpuakna a nei hi.

Zia gual ma chun, I nam khan leh chawndan in zia chu i chiapi’u in, i zui zing uhi. Pathian dawisakna pawsal te’n mawpuakna liantak i chan uhi’i mang phachuam leu hin chu Insung, Inkuan, khawtang leh gamsung ahin thilpha tamtak i sepdaw uh ging chak a um hi. Pilvang tak leh chingthei tak ah enkawltu ihi nau hi’i hedawk thak in, thilpha leh thilphalo tuntu ihi ziak un, thuneina matkhial a bailam ma ma a, kiveng phat a pawimaw takzet hi.

2. Primogeniture (Go lua tu)

– Thilsiamthu Bung 25 na khan Go lua tu ding, Pa lam ah Chapa piang masa pen chatil in, a pa insung nei leh go zosia a nei ding thu leh chapa lian zaw ding hi utna chanchin Esau leh Jacob apat in i mu’u hi. Lengte 1 na bung 21 chun, Leng Ahab in Naboth kiang in a grep huan chu a thai huan ding in a dawn ah, ahin Naboth in, “Ka pu leh pate go ei nutsiau hi nang ka hun piak ding chu Lalpa’n a phal puai, hung pia pua’ng ka” ati hial ahi. Zia gual ah go chan ding, go luatu ding leh, go etkawl na lam in Pathian le alak in kigawl kha hileh kilawm in imu thei hi.

I Nam khan leh chawn dan in le zia gual a chun go lua tu ding chu, Pa lam ah Chapa piang masa pen ahem, suan le pak luatu ding umlo in le, a suapipa kua hem insung kuan apat mi pakhat pen pen kiang in I lua sak sek ham ham uhi. Zia gual ah nei leh lam Go thil ah

lam dawsa chung chang ah go lua tu ding hi'i tulai chîn dan tawh aki banglo maithei, go mu dan dik leh diklo apat hin amat dan hi le alamzang leh alamzang lo maithei hi. Ahi'n Pathian apat go chan ahi chun, a mu dan dik intin, a etkawl dan le lamzang ding in gingchak a um hi.

3. Betrothal Dowry (Man leh Mual) lêdan dikpen le hilo maithei – Thilsiamthu 25:53 na Isak tawh Rebekah kichenna ah Abraham suak pa chun man leh mual ding in dangka leh sana kicheinate, puante ahun ladawk ah, Rebekah a pia ngal ah; a suapipa leh a nu kiang in le kicheina manpha tamtak te chu a pia'i ti imu ahi. Chun, Leng David leh Mikhal kichenna ah Leng Saul in a chanu man ding in thil dang bang ma a ngek pua, ahin Philistianta mi zakhat zekvun a ngek hi (I Samuel 18:25-27). Thil haksa tak himaleh David in a zi man leh mual ding in athiltup chu kipaktak in

asukpitin piak hi. Chuleh, Jacob leh Rachel kichenna ah, Jacob in Rachel a kichenpi thei na ding in apa Laban kiang in kum sagi hial na a sep piak hi. Zia bible chang te apat hi'n, I Nampï khan leh chawn dan ah man leh mual phutna a sum leh ganca pang khello himaleh, Israel chate'n ala chiapi tau ahi.

Zia khan leh chawn dan ding hi mumal tak ah i chiapi zel thei ahi chun, Nam za um, nam ze nei, nam piting leh nam chawihawitu hi in alang sek hi. I Vaiphei Nampï huam sung vak thil leu hin, khan leh chawn dan i chiapi zel sek uhi, malai i pupi te hun lai apat ala kimang pan ahi hen, zia tak a pat leh zia hun in ala kichia pi atai ti thei ding leh hilchian thei ding mi ki vang ma ma in ah, khawi ah hung ki pan ah, khawitak ah ki ladawk leh kuate ki entawn ahi vang hilchian thei puai tiu. Lampi chuam in ivak suangtua ahi chun, Khristian i hi masang un le,

bang gual kiho na azat chet gentheilo maleu hin le ipu leh pi ten ala bawl tan'au iti mai thei, ahi'n zia chu ahi chun, ipu leh pi ten nampi chawndan mumal tak ahi ti ala kihelo maleu, amau ah thil ala chînsek dan leh chiapi dan (custom/culture practice and tradition) chu kituptak in ala neisek ui ti vang ihia'u hi.

Amabochu, i pu leh pi ten ala chia pi khan leh chawn dan hi kua hung pat daw hiat chian hilo ma leh, i Bible thu zik te apat hin mu thei leh hetthei ding ah zil ding tamtak a um hi. I Bible apat ilak daw'u hin ah ti vang igen ngam puai, ahin i nisin khan leh chawn dan teu hi'i i suithuk chan in i Bible thu te tawh kituak ah, zia ziltil na apat hin mang phachuam thei chiat di'n iki dawisak ahi.

BIBLE ZILTILNA DIK

Pathian lekha thu zosia hi Pathian hat khum ah kizik ahi'n, thuhilna, ziltilna, bawl dikna, kizil na ding in

a phachuam hi (II Timothy 3:16). I thupi in atup pen chu, i Bible thu ken hi ei uh a ding ah Thu manpha, thu hawi leh thu tak tak ei zil tiltu hi in alang hi. I Bible apat hin, bang gual ah khan leh chawn ah khawsak ding a diam ti ei mu daw sak hi. I Bible hi Pathian thu ahi'n, a ziltil na hi taksa leh thagau a ding ah, ginna leh thil hi thu ah te na diklo theilo chu ahi (PCI Thugin 1).

Pathian nam tel te ihi chun, i Bible in khan leh chawn ding dan chung chang a gen apat hin, imit ei suk vak piak a, i nakhang ei hi pil piak leh i ngaitua na ei hi navak piak in ihe tau hi. Mi thiam te chun, Bible mangcha in, Dan (By Law) hawi tak tak te, Kikailhuaina Danpi (Constitution) leh sep leh bawl ding dan tamtak a panlak nateu siam na'n amang sek uhi. Thutak in ei sua zalen sak ah dikna in ei hi navak sak hi (Johan 8:31-32) ti zik gual a khan.

Mahatma Gandhi ngei in le a damsung sia, New

Testament a sakhau ah kikua zing in Jesu zil til na a mang phachuam hi. Sapkang te (British) khut apat India mi te'n zalenna a muthei na ding un Jesu ziltil na Thudik din pi (Stand for the Truth), leh Hiam leh thal panglo (Non Violence) mangcha'n zalen na ala tut hi.

Zia gual ah ginglo tu te'n amau ki puihuai na ding ah, fel leh bit tak ah zui ding, Dan pi hawi tak tak siam daw na'n amat thei uchun, ei uh gingtu Pathian daw dan hechian leh mu chiantu ten i hinkhua khawsak na Khan leh Chawn Dan ah Pathian daw gual ah mangpha chuam ding in, ki bulphu thak kit hi tiu. Gingtu hizing ngal ah buaina insung leh khawtang ah ituak phat leh, Khawvel dan gual ah thingnuaimi (Underground Militant) te khut po in thutanna ilak ziang sek teu hi akhawk sek ma ma hi. Gingtu hinkhua

siampha tu ding chu Kochuam puitute ihiu ah, Kochuam puitute kingakna chu I Pathian thu ahia, zia chu Bible apat imu vek uh ahi. I pu leh pi ten ala chiapi khan leh chawn dan hi kua hung pat daw hiat chian hilo ma leh, i Bible thu zik te apat hin mu thei leh het thei ding zil ding tam tak a um hi.

THUKHAKNA

I Bible in taksa khawsak ding dan khan leh chawn dan bep ei ziltil pua, taksa thinung a le thagau lam damna mu thei na ding hinna lampi tiang ei kaww mu ahi. Zia ziak chun, khawvel thuthang chanchinbu te bep sim lo in i tunung hinkhua siampha thei ding; hiatna, chitna leh pilna ei pe thei hukdamna kaww ei hawnpiak thei hukhinna lekhabu thiangtho chu changtel in sim in mang phachuam hitiu□

JOCHEBED PAUCHAPNA

Ziktu: Upa R. Vaiphei, Kangvai

Changtel: *“Ginna’n, Mosi chu a pitin phatin, Pharoah chanu’ chapa hiding a nuam puan, sawtlo sung bep gitlo nawpchen limpi sa’ng in, Pathian mite tawh sukgentheina thok chu a te’l zaw tai. Krista a musitnau chu Aigupta ah go te sa’ng in hausakna thupi zaw’n a ngai ah, kipakman mu ding chu a thil ziak in.”* Hebraite 11:24-26.

Mosi pian hunlai in, Isarael te a ding in hun haksatak ahi lai ahia. A Sal taannau Aigupta gam in a punghaat ma mau ahi. Aigupta Lengpa Pharoah chu a lungkham ta. Naulai domte kiangin, Isarael te nau piangthak zosia chu pawsal ahi leh that ziangsek ding in thu a pe tai. Himaleh naudomte chun Pathian a kichaak ziak un, that zianglo in “Isarael numeite chun, nau nei a bailam un, amau tun ma ala piangzo fel man sek hi,” ti in.

Zia gual hun haksatak ahi laai ah chun, Aram leh aji JOCHEBED chun cha pawsal melhoi ma ma ziang, ahun neitau ahi. Pathian ah ginna nga kom in nausen chu tha 3 sung a selgu tau ahi. Sawt selguk thei ahilo phat in, phailuang (pumpeng) in BAWM a siam ua, vahaibuan leh thingnaai in a tuaibit ua, tha 3 mi beb Mosia nausen chu a lupsak ua, Nile luigei phailuang (pumpeng) lak in a selgu tau ahi. A u a suapinu Miriam chun Mosia nausen

bawm ah kikoi, pumpeng lak ah selguk chu a guok in a entha zing ahi.

Ziatakah hin, i lungthim mittha ivak ngaitua chun, Amram te nupan; a diak in aji, Mosi nu, Jochebed chu bang gual bep in, a lungthim na’n, a lunggim ta diam. Nausen tha 3 bep, i lop leh nui thei bep, midang khut leh a nu’n a paina khut hekhen thei bep, melpha ma ma ziang chu, a nawi a chepsak pet in, enchim theipuantin, lop chim

thei him him puan ah. Chutia, nausen anu malchung leh khutlum ah muang ma ma, bang ahungsuak ding le hiat hilo ah kawimang ziang chu, suun ma ma ding ahi. Leng Lal Sainuna La siam “Chuun chawiloten dawntuai par ang vulni awm tak ang maw ?” ti La kha geldaw a um ziang hi. Ziatakah hin Mosi nu Jochebed chun khawvel ah panpitu ding leh belding a neilo hun ah hin, a gin leh a biak Abraham Pathian, Isak Pathian, Jakob Pathian chu ko in beel ngei intin, Hannah cha neilo ah a lunggim lai ah Pathian ma angah a puukluut ah a pauchap gual khan pauchap ngei ding ahi. Thuthung thak ah Mari pauchapna ‘The magnificent of Mary’ chu Bible in Luke 2:46-55 in i mu’uh ahi. Hannah le cha neilo ah a lunggim laai ah a pauchapna Samuel Lekhabu 1 bung 2:1-10 in imu kit ah. Chun David leh mi dang dang pauchapna te le Bible in mu ding a um hi. Himaleh, Mosi nu Jochebed pauchapna hi Bible in a la zik talo uh a hi. Simtu daw tak, Jochebed pauchapna, Lalpa kiangah a thildawt te leh

kipakthu a genna te hi, lunggil tak ah Lalpa Thagau thiangtho hiatsakna in kinga mai hi tiu.

P A U C H A P N A
dawnhutu Lalpa chun Mosi nu Jochebed pauchapna chu hun dawnhu in, nausen Mosi bawmsung ah pumpeng lak ah selguk ah um, a u a suapinu Miriam in a etgûk zing chu a hung kap ta, Pharoah chanu a suak numeite tawh Nile lui ah kisil dingah hungte chun a hun mudok tau ah. A bawmchu a vak hawn daw’u leh Nausen melhawi ma ma Mosi chu a hun mu tamai ua. Khawvak leh mihing mel ahun mu phat in nausen Mosi chu a ka laai hai in, a hung nui ta (zia tak scene cheng hi cinema film ah ka mu gual ah ka hun gen ziang ahi). Zia tak ah hin Jochebed pauchapna Lalpa’n a ngaithaak piak hi ti i hethei ngal uh a hi. Pharoah chanu chun nausen chu a pai ah, a tuamna puante apat Hebrai nausen ahi a he, a lungsiat ma ma ziak in, a chapa ding in a kilak ta; tuilak apat lakdaw ahi ziak in amin in MOSI a sak ta a hi. Miriam chu a va chia

ah, Pharoah chanu kiang in “Nausen dawn ding in, Hebrai numei ka va hawlpiak diam?” a va ti ta’i. Pharoah chanu chun a va hawlpiak ding chu pha a sak phat in, a tai ah a nu Jochebed chu a va ko tai. Pharoah chanu chun nausen chu anu Jochebed chu nawichep a hai masia vâk piak ah a vâk man piak ding in a pe tai. Hebrai pawsal nausen tha dingah Pharoah thupiak lak apat a nu Jochebed pauchapna Lalpa’n ngaitha’ in, Mosi a hun venbit dan hi a lopi taluai. Mosi chu Pharoah chanu nu chapa a hi phat in, Aigupta Crown Prince ahung hi ta, body guard nasan neita hial ding in ka ging cha a hi. LALPA CHU LOPINA CHANG TA HEN.

Tichun, Jochebed chun a chapa Mosi chu lungchim tak in a enkawl ta, kum 3 a diam kum 4 a diam a hung tin ah, nawichep a haiphat in, pharoah chanu chu a peta, Mosi chu Aigupta Leng insung ah chun thiamna/pilna tincheng hun zilto in a hung seilian tai. Ka lungthim ngaituana ah chun ziatak ah hin Jochebed chu Lalpa kiang ah a pauchapna

chu chawldiaklo in, ha pauchap zaw diak ding in ka ngaitua hi. Anu Jochebed pauchapna gual ngei ah chun, Mosi chu a hung piting to pek ah, sia leh pha dawitelna neithei khop piting a hung hi ta. A chungah i Bible châng tel in a gen gual in, Pharoah chanu nu chapa um ah Aigupta Leng insung ah Pathian hephalo ah nawpchen saang in, Pathian hezing kawm ah, Pathian mi Israel te tawh sukgenthei ah um chu a hun dawi tel zaw ta. Zia tak ah Mosi dawitelna hi a tel kha na diam le ? Aigupta go te ala telzaw hileh chu Aigupta Leng in le hung pang na khat intin, Leng hi-na tawh damsung ah nawptak ah khawsa’n tin, History bu vel ah Aigupta Leng te min lak in, Mosi min le chuangpha ding ahia maw ! Hilehle, Khrista a musitnau chu a hausakna’n a ngaazaw ahun teelzaw ta, a la dawitel zawk Krista hausakna kipakman chu a lei damsung ngei inle, ahun mu pan ta, Pathian chitel Israel te chu a sal taan nau Aigupta apat a hun puidawk ah, Pathian thilhitheina zia in Tuipi san a vaikang ah, thalek ah tui

umlona tui apia, melma te a zo pek ahi. Tuni hin, Bible ah puitu (Leader) lopi ahi bep hilo in, Jawlnei lopi, Bible ziktu masapen, Sinai taang chung ah Pathian thusawmpiak la tu. a lei taksa mit ngei ah Pathian mu khale ama Mosi ahi. Thuthung thak hun ah, mel danglamna tang chung ah leimi leh vanmi meeting (Conference) a nei nau khanle a hung lang ah, La phuaktu ten “Lal David le ei puipa Mosi lah, Lei aksi lian a tum tau ah; Tuhin Lal Khrista leh Thagau thiangtho, i Thiampu lalpen leh i aksi’u chu....!” ti in a saam ua, thiampu lalpen leh aksi hi-na a changphaak ahi. Zia Khrista a musitnau, a la dawitel hausakna kipakman amu ding chu a lopi na ding e. Zia phat chuleh nang leh kei inle ala kipakpi in “Mosi leh Belamno La” chu ala sa ding i hui. Timothy chu Pathian ginna anei chu, api Loisi leh a nu

Euniki kipat a gochan a hia. Samuel chu Pathian a ginna a nu Hannah pauchapna ga a hi. Nang leh kei inle Lalpa kipat i gochan i cha i nau te hi Lalpa ginna lamin pauchapna tawh banggual in pan i la nam? Pastor, Kochuam upa, Revival Speaker, Missionary chu Lalpa’n a ko leh a guat chu hina’n nau. Ahiziakin, ziate hikhello taleu le, i cha i nau te chu Pathian ginna ah pauchap pum in pan la leu hen, a nek hawl nau chuam chuam sepai a hem, office clerk ahem, peon ahem, sumdawng ahem lo nasem ahem sem pum in Kochuam kingakna khuam ah a pang thei zing ui ti hezing in, pan la hi ti’u. Lalpa’n i pan laknau ei malsawm ta hen. Amen!

(Please note: Dt. 18. 2. 2020 jan ah Kochuam palai a hina dawl ah KNP te kikhawpna Kangvai Biakin ah a thugen lak chawm a hi)

Chutichun, suapite haw, Lalpa hung masia thuak-hat tak in um un. Lou neitu chun gawtui kia masa leh nunung chu a mu masia, thuak-hat tak in leiga pha tak chu a ngâk sek hi.

- Jakob 5:7

KUMTHAK SERMON
PILVANG TAK AH HINKHUA MAT A PAWIMAW'I
[Ephesa 5:15-17; Rom 13:11-14]

*-Pro-Pastor H. Lamthianmuan
Panglian Pastor Bial*

Thumapui: Bangziak ah pilvang tak ah hinkhua mat pawimaw ahi em? Nite a phat tak lo ziak in ti hi a dawnhuna a hi. Khawvel hin phat lam sang ah siat lam hi manaw deu deu ding ahi ti hi chian tak in a kilang hi. Kum 2020 ah khawvel gam mun chuam chuam ah thil tung zosia ten kichian tak ah, ei hiatsak chu, hun nunung lam ah um i hi tau ti hi a hi. Khawvel mite gual ah mani dawidan dan ah khawvel hun hi mat mai mai thei ahi ta pua'i. Pathian dawi gual bang ahem ti kawm ah, Pilvang tak ah hun mat hi a hun tak zet ta'i. Pilvanna ding ah pawimaw a nuai ah te hi zil khawm hi ti'u.

1. Tulai thil um dan te ziak ah:

Sakhua thil ah: Kum 2020 ah khawvel ah Covid-19 ziak ah Pathian Biakin te a kikhak lem lum ziang ah, Biakin kai nuam ma ma te â ding ah le kai thei lo a hung hi ta. Khawvel gam tam zaw ah Biakin kigual tak ah a kikhakna masa hi ding in ginchak a um hi. Khristmas leh Kumthak hun pi le a mang thei kochuam khenkhat um ma leu hin, mun tam tak ah chu, kumdang gual ah mangthei lo a kium sau sau hi. Khawmpi

kivaihawmna chuam chuam, kochuam ten i nei sek uh le, kum chia tasa te gual in mat thei a hi pua. Kum 2021 leh a nung lam ahin le bang gual ah hin kochuam ten hun i hung mang to zel diam ti hiat phak ahi ta di pua'i.

Khawvel ah thil tungte ziak in: United States of America ah presidential election ziak ah buaina tung zozai leh bang gual buaina in a hung zui zel diam ti hiat a hi puai. China in a kigamgitpite a chaw buai dan te, South China Sea ah

buaina a siam dante, India ngei tawh le gamgi zia ah kidona bang tik lai ah pawt thei zing ahi dan te, India gam sung ah tuilian zia ah buaina, accident zia ah buaina, tualtha zia ah buaina, lockdown zia ah nasepna sem zawmthei ta lo te. Chun, doctor thiam pung deu deu, natna chi chuam chuam la pung deu deu. Galvan hawi pung deu deu, kidona nai deu deu, kum 2020 sung ah India in galvan chawkna ah a paisa sen zozai te kha, i gamsung uh siamphat na din mang ta leh a phat chuam ding mai zen tawh, galvan min a chawk chawk ziang phat leh chu gal a nai tai ti a hiat thei hi. Tuhin, Nuclear War bang hung um ta phut leh khawvel mihingte leh thil hing dang te thi tam ding dan hi ngaitua ngam um lo khawp ah huaisia a hi.

Zia zia chun, Paul in, “Tulai hun umdante hi la het zia un, ipmu lai thawhal a hun tak zet tai,” [Rom 13:11a] ala ti kha, tuhun a ding in a pawimaw tak zet ta’i. Zia zia ah chun, mi ngawl te gual

ah um lo ah mipil te gual ah pilvang tak ah Pathian lung lam hawl zing pum ah um hun chu a hi tai.

2. Duamna lak ah pilvan ding:

Tulai khawvel ah mihing te hinkhua ah duamna’n mun a chan nasat dan hi a huai sia ma ma hi. Paisa ah duamna, gam leh mual ah duamna, mihing ah duamna [minu, mipa a kawppi ah lungkim lo ah a dang daw be te genna a hi]. Gamkhat leh gamkhat kikal ah buaina te, state khat leh a dang kal ah buaina te, vengsung khat ah mimal kal ah buaina te haw khu a tang pi ah, a duam zia ua hung pawt daw ahi deu sek hi. Zia zia chun, Pathian chate chu duamna lak ah pilvang ding in Lalpa Jesun zia gual ahin ei zilsak hi. “Huaihapna lak a chun kiveng un! Nei leh lam leh thil hauna mai hi mihing dampi pen ahi puai,” a la ti a hi [Lk 12:15]. Sum chung chang ah Bible zilsakna chu, “Dangka sum ngainate chu dangka’n lungkim diak pua’n tin uh;

hausakna leh lawkna ngainatu chu lungkim diak puan a,” ti hi [Ecc 5:10]. Ahinla, tulai khawvel ah Piangthak kahi kitite lak ngei a hin le, duamna hin mun a chang sang ma ma ta ahi.

Lalpa Jesu'n duamna lak ah pilvang ding ah ei zilsakna tawh kituaklo tak ah hinkhua mang a kitam ma ma hi. Khawvel hi ka khualzinna gam a hin, ka nutsia ni hung tung ding ahi ti hi hechiantu dik tak ten vang, duam dan chintawk a he sek u'i. Gingtu tam tak ten khawvel hi i kumtuang mun ding gual un i chei bawl ua, sum leh pai, mun leh gam i nei theina ding uh ahi phawt chun, lamdik lo ah mu leh nei khawk i sa kei ta puau hi. Diklo tak ah hausakna hin daisawt kei lo ahi ti hiat zing ding a hi. Jeremiah 17:11 ah chun, *“Diklo tak ah hausakna khawlkhawmte chu, vaveng ama tui hilo awpkeu gual ahiu a; a khangdawng lai un ama chu nusia intiu in, a tawp phat leh a ngawlnau kilang tan a,”* ala ti a hi. Tulai ah mitam tak te hausakna hi i

et veng veng leh, a daisawt kei pua, a ziak chu, sum leh pai a lak lut dan uh leh, nei leh lam a khawl khawm dan teu hin a zil lo ziak a hi.

Khawvel thil hi kumtuang dai ding pakhat le a um lo ziak in, Gingtu dik tak ten vang khawvel ah i um sung ua hin duamna lak ah pilvan ma ma ding a hi. Sam ziak tu'n, *“A min un gamte nei in, a Inteu chu suan zosia tiang ah, um ding gual in gel maleu, a than uh chu a kumtuang in ding uh a hung hi tai,”* [49:11-12]. Zia ziak chun, Lalpa Jesun, *“Lei ah nget leh tuiek in a neksiatna leh guchaten a gûk thei nau ah gokhawl ki'u inla, Van ah khawl zaw'u in”* tin ei zilsak hi [Mat. 6:19-20]. Pathian hepha lo ah khawvel ah go khawl te hi a khawvel hinkhau kichai tawh kigual ah kichai ding te a hi'u.

Pilvang tak ah hinkhua mang ding ah Bible in zia gual ahin ei zilsak hi, “mipha lampi chu haw inla, mi dik lampi chu zui zing in, milam zang

te chu lei chung a hin cheng in tin uh, pha bukimte chu zia tak ah chun cheng den in au; miginalote chu lei chung ah kipat hi mangthai in tiu in, mi ginumlote chu a bul a bal ah bawdaw in um ding a hi'u," [Prov 2:20-22]. Duamna lak ah pilvang tak ah hinkhua mat a pawimaw zia a kilang chian ma ma hi.

3. Hun mat dan ah pilvan ding

Pathian in mi zosia nikhat ah dak kal kibang chiat ei pia. Damsung khawsak na ding buai pina hun ding leh kumtuang gam a ding buaipina ding ah hun hawp thiam hi a pawimaw ma ma hi. Khawvel hinkhua bei ding hun kua man i hiat lo ziak un, hun mat dan ah pilvan ding a hi. Bangtik hun ah le thithut thei i hi ziakun i Lalpa tuak ziang ding ah hinkhua mat a pawimaw dan Lalpa Jesun zia gual a hin ei zilsak hi, "La kawng uh gak unla, la thau mei uh vaksa'n um un; a pu mo lawm ah chia hung tun kit hun ding helo ah ngak, a suakpa gual in kiging

zing in um un...; apu a hung phat ah, kigingsa a la um zing a suakte chu mi hampaha a hi nau e," [Lk. 12:35-37]. Zia gual ah suak a pu ngaichang zing pa gual ah ei uh Gingtu te hi le um ding in Lalpan ei dawi hi.

Tulai ah khawvel khantona in a hung puak daw challeng kit ma ma thumal pakhat chu 'kabuai taluai' ti hi a hi. Khawpi lian leh thingtang gam ah le zia thumal hin mun a chang sang ma ma hi. Kuama hi buai lo kium lo, himaleh, hun matdan thiam ten vang hun hi kidai tak in a mang thei tho u'i. Gingtu khen khat hi Martha buai ah buai, damsung khawsakna ding lam bep ah buai, Pathian thu leh a lalgam a ding tawh kisai ah bawl ding a um phat leh, hun ka nei puai, ka buai ta lua hung pang man lo ti zing sek, himaleh, khawvel lam thil ah pawimaw a sak te chu bawl man kit tho. Zia gual gingtu te hi chu a dik tak ah gen ding in, piangthak tak tak lo, gingtu lem te a hui. I hunpha hi a kikhel ma sang ah kisukdik

ding a hi. Thudik tak chu maw thil pawimaw i sak tak tak te hi chu bawl man lo um lo a hi. Ka bawl man puai, i tisek teu hi chu, i ngai pawimaw tak tak lo ziak ahi sek hi.

Mosia pauchapna “*Ka dam sung niteu tiam dan ei hil inla, pilna lungthim ka nei khawlaw hial theina ding un,*” [Sam 90:12]. Zia pauchapna hi ei uh a ding inle a pawimaw ma ma hi. Hunchia tasa ko kit thei lo, hun hung tung ding thu ah thu nei na kinei lo, ahin tu ah i hun mat zing lai hi pilvang tak ah mat a pawimaw ma ma hi, tunung ah kisik in um zia a nei tak lo hun i tun man, i tu hun hi pilvang tak ah mat ding a hi.

Thukhakna: Pilvang tak ah hinkhua mangte leh pilvang lo tak ah hinkhua mang te hin kibat lona nasa tak a nei u’i. Tukum 2021 leh a nung lam ah hin bang gual in khawvel hun hi a hung um to zel diam ti hiat ahi pua! Khawvel hin chu hun haksa hi hung tuak to zel ta ding vang a hi. Zia ziak chun, i hun matdan ah te pilvan a hun ta, khawvel thil ah duamna lak ah pilvan a hun tai. Zia khawvel ah i dam sung ziang leh i kumtuang hun matna ding ah, kisik ngawi ngawi ah hun i mat lona ding un, pilvang tak ah hinkhua mat a pawimaw hi. Kimu zosia a ding in Lalpa’n malsawm ta hen.

THU SUA DING THAWT THEI ZING

I magazine dawithaw tak, *Hinna Vâk* ahin thu sua nawp la nei chun kisuangla lo hial in a thawt thei zing hi. *Sermon, Article, Khristian et tawn tâk tak takte chanchin, Bible Study, Hiselna lam tawh kisai* leh thupi dang dang mangah lekha zik te a piaklut thei zing hi.

Email: mparea@gmail.com

Editor : 9862228014

Kumthak Sermon

“THUAK HÂT TAKIN TÂI HI IU”

Heb. 12:1-2

-Rev. T Zuanlal, D. Phailian Bial

Pathian hepina zâl in kum thak i hung galkai thei tau a, Lalpa puina i chan ziak in kipakthu i gen a hi. Kum 2020 sung hi Covid 19 hipi zia kin dawî gual in bangma a hi thei pua da a um ma ma zing hi. Mithiam te gen dan a chun zia Covid 19 hipi hin 2021 leh ei nusia nai diaklo ding ahi dan a gen ua. Zia natpi zia k a hin Pathian biakna (Biakin) a chawlta a hin eima insung chiat a chun Pathian biakna i nei thei nalai uh hi. Malam hi Pathian puina lo a chun a thyim map mai ahi. A hin hat chungnung Pathian bangkim hithei chu en zingin kumthak ah Lal nasepna leh i nisin hinkhuau a hin thuak hat takin tai hi tiu. Thuak hat tak a tai ding ah i kisingsak laiun Bible ah Lalpa nasemtute chanchin a patin holim hi tiu.

1. Alexandar (2Tim. 4:14): Hawilo takin a panna phalo tak in a tawp hi: Ama chanchin hi 1Tim. 1:8-20 sung a hin gen in a um hi. Ginna a phaatsan dan leh sia hiatna chu Pathian a ginna lam a chun kuang kek gual in a buaisia ta a hi. Gitlona zia kin a sia leh pha hiatna chu a thiang ta pua, a dawilam uh chu Pathian nasep leh khawvel thil a hi tai. Alexdar gualin soal simlo ngaituana buak Pathian nasep

sung a Pathian nasemtemusit leh gensia gingtute lakin a um hi. Ki taisaikna lamdik ah tai sang in la diklo in tai zawu hi. Chuti chun Pathian hepina neilo a na sep nawpna le nei talo in a um thei uh a hi, soal simlo a chun.

2. Dema: A bawl pan hawi maleh hawilo tak ah tawp: Pathian kiang ah sawlchak Paul in lekha a thawt a chun, “Ka sep gimpi” (Philimon 23)

tiin a la gen a. A hin a vaiokhaw nung ah Timothi kiang ah lekha a thawt a chun Dema chun tulai khawvel a ngainat ziakmin Thessolonika khuan a chia tai” a tia. Gamthiangtho zawtna (Pilgrim progress) lekhabu John Banyan zik chun, Thesalonika khua a hin sana laidawna khuk a um in zia tak a chun Dema in a sem in, midangte a chial hi” a tia. Dema, Pathian genna Paul tawh kithua sekpa kha khawvel ngainatna thepna in a puk ta a hi. Dema gual ah sum leh pai dawina ziak ah, Pathian hepina nutsia khak tawl hi tiu.

3. Luka (2 Tim. 4:11): Phatak cha bul pan phatak cha ah zo: Luka hi chanchinpha Luka zik a Apostolte nasepna bu ziktu a hi. Ama hi damdawi thiam, Doctor a hi. Ama hi doctor hina chungin chanchinpha gen pawlte a zawm hi. Amah in thilpiak thupi tak a dawng a, midang tawh kibang loin a thil hi phatakin a tepte diam daim a, Thuthungthak Bu a lekhabu zikte (Luka & Nasepte) hin

hiatna fel tak a sulang a, Aman a bul pha takin a pan aa tawp inle pha takin a zo hi. A damsung khualzinna le dawium tak ina zo hi.

4. Marka (2Tim. 4:11): A bul lam in hawi zolo maleh a tawp in a hawi hi: John Marka hi Paul tawh Barnaba Missionary khualzinna a kitawn ua, A khual zin lai ua Pamphulia gam ah Perga a tun phat un Paul leh Barnaba a nusia tamai hi. Ama ziak in Paul leh Barnaba kikal in buiana a um khawlaw ta a hi. Paul in chanchinpha nasepna dingin hun lemchang a niveina piak a nuam pua, maleh Pathian inhunpha a pekit hi.

A pu Barnaba chun a enkawl a hi. A lawsapna patin a thodawk a, Phelimon 24 na I sim chun Paul “Ka sepgimpi” tiin a kota a hi. Paul a thi ding kuan ah Timothi a lekhathawtna a chun Chanchinpha nasepna in a phachuam in hun puikit in a ti ahi. Lawsapna um maleh Pathian hepina chun a tungding

kit in a nasepna a mualsua hi. Chanchinpha Marka ziktu a hi tamai ahi. Kua leh Pathian in a mat ding ah kipete chun Lalpa thil guanggal a nei hi. La hinna Pathian in a mat ding leh a lemguatna mu ding in la kipe nuam diam?

I hiatmil lo ding uh chu banggual ah hat ah sem in tai maleu hin a tawp chan a i tailo chun zotu hithei lo ding I hi'u. Thupi tak ah kipante le thupi tak ah zotu a hi diak puau a, zia gual am chun hawilo tak ah kipante le hawilo tak ah zotu a hi diak puau. Zia zia chun thuakhat tak ah tai ding I hui ti he zing hi tiu.

THUKHAKNA: Jesu Khrist ah hukdamna leh nungzui hi ding ah chunglam kona chu tuchak zing hi tiu.

MASAWN HITIU: Jesu Khrist van lam ah Pahtian kona sang tak kipakman chu mu dingin Kung (Goal) lam zuan /del ham ham hitiu.

PHA TAK AH ZO: Paul in Timothi a fuina gual in chingthei tak ah masawn a, haksatna thuak, ginna kidona pha chun do, kitaisaikna mualsua ding in ginna vawp det zing hi tiu. Lalpan thi tiang ah ginumte chu hinna lal lukhuk pe ding ahi. Tukum Ginna I kitaisaknau a hin mualsua thei dingin simtu zosia Lalpan malzawl ta hen.

Pathian chun kraws ah khan a hepina a hung sulang ta a hi. Kraws lêkah Jesu khaikân a hi ah, a thisan hung luangtha chu Pathianin khawvel kiangah *“Ka hung hepi hi”* a tina a hi.

~ Billy Graham

KOCHUAM HUANG

1. **January 6, 2020 ah Office hawn ahi.** January 6, 2021 Nilaini khan Manipur Area Administrative Office chu a hun tak ah hawn thei a hia, staff te le Pathian zal a kim tak in kumbul a kipan thei a, kipak aum khawp mai hi.
2. **Pension pawt** Upa Soitinkhup @ Kh. Khupa Area Office ah peon semlai chu kum 60 a tin tâk dungzuiin pension in a pawt tai.
3. **Peon thak** Evan. Lamzasei D. Khawzim Pastor Bial ah K. Lawnmual ah Evangelist na sem sek kha tukum thak apatin Area Office ah Peon nasem tadi phawt dingin deputation ah kawî a hi. Aman le January 06, 2021 Office hawn patni ahin a na a hung join ngal thei ah, kipak a um ma ma hi.
4. **Piting SS Zillai Bu, Nilai Bu leh Area Calendar** MSSU siam Piting SS Zillai bu chu Vaiphei pau ah ledaw ahia, hun chomcha sung ah guat ah um ten kum dang sang ah kitup zawn ei bawl piak thei ua kipak a um ma ma hi. Rev. S. Khaikholam in 2021 Nilai leh Beigual thupi bu dawi um tak in ei zek piak bawk a, kipak a um ma ma hi. Manipur Area Calendar le mawi tak ah sukdaw a hi kit ah eima kochuam or bial mamaw ding zat lak ziang thei a hi.
5. **Pastor Bial thak** S. Munnuam Pastor Bial thak chu January 9, 2021 Kiginni khan Rev. R. Lalhminganga Administrative Secretary chun a hawng tai.
6. **Pastor leh Pro. Pastor Transfer te**

Synod kikhawmpî 2019 in a guat gual in a nuai ah Pastor leh Pro. Pastor ten a umna ding mun ua kiguat dungzui takin 10th January 2020 Pathianni khan Induction fel taka nei zaw a hi tai.

Sl.No.	Min	Umna masa	Umna thak	Induction neipi tu
1)	Rev. K. Jama Vaiphei	Leilon	Lamka	Rev. R. Lalhminganga
2)	Rev. Kanga	Lamka	Lamka	Rev. R. Lalhminganga
3)	Rev. Thianganlim	Phailianbung	S. Munnuam	Rev. R. Lalhminganga
4)	Rev. Thangneipau	Imphal	Panglian	Rev. Malakia Lalnunfela
5)	Rev. Ngurthanmawia Sailo	Panglian	Imphal	Rev.S. Lama Vaiphei
6)	Rev. Hesei Vaiphei	A/S Office	Leilon	Rev. Lalremliana Colney
7)	Rev. Siamlaron	New Lamka	Phailianbung	Rev. Nicky Lalremmawia
8)	Pro. Pastor Khuplemlal	Leijangphai	Lamka	Rev. R. Lalhminganga
9)	Pro. Pastor Minthianboi	B. Tuallian	Kawlhen	Rev. C. Lalngaihawma

Chuleh, Rev. Lalpiaklian, Rev. Khaisonthang te hi Aizawl Theological College apat ahung pawt tak ualeh induction programme nei bep hi ding a hi. Myanmar gamsung ah Pastor bial pani Tungkyo leh Kalemmyo ah um ding Rev. Zuankhomang leh Rev. Thangliansang te hi amau in a la kibawl mai ding ua hiatsak a hi tau hi.

7. **Revival Speakers leh Team te kisukthakna:** Manipur Area Revival Committee chu January 13,2021 in Committee chutkhawm ahia, Speaker ding ah Committee 2020 in a lak Pu Kamzathang, Tv. ST. Satboi leh Tv. M. Sasang te chu kumlui ah Covid 19 ziaak ah bangma activities le um theilo gual a hi ziaak in; 2021 sung ahin le sem zawm kit phawt mai leu a ti a hi. Speaker leh a Team teu â ding ahin kisukhal thakna programme February 02, 2021 ahin Gelead Tang ah matpi dingin a guanggal bawk u'i.
-

KKP HUANG

**KHRISTIAN KHANGLAI PAWL (KKP)
VAIHAWM KIKHAWP (2021)
PROGRAMME**

*A mun : Leijangphai Kochuam Biakin,
Leijangphai Pastor Bial*

A hun : 12th – 14th March, 2021

*Thupi : “La chawtna taphawt chu la gam hizel
in a” Joshua 1:3*

**6:00 PM 12th MARCH 2021 (SIMHAINI)
PALAI LAWPNAL LEH BIAKNA KIKHAWP**

- Puitu : Rev. C. Lalrinliana, Leader
Pantu : D. Khawzim Bial
Reports
Khaikhawmna : General Secretary
Lapawl : 1. Phaipheng Bial
2. Munpi Bial
3. Mata Bial
Thugentu : Rev. Eric Lianlalmuon,
i/c Leijangphai Bial

**13th March 2021 (Kiginni)
(9:30-3:30 PM)
VAIHAWMNA**

**6:00 PM 13th March 2021 (KIGINNI)
BIAKNA KIKHAWP**

- Puitu : Greenson Satminlensang
Committee Member
Pantu : Phaipheng Bial
-

- Lalpawl : 1. Kawlhen Bial
2. Sugnu Bial
3. Manipur Area Choir
- Thupi gentu : Rev. S. Lama,
Coordinator
- Thupi : “La chawtna taphawt chu la
gam hizel in a” Joshua 1:3

**KIKHAWP PEL
FELLOWSHIP PROGRAMME**

- Puitu : Tv. Sutminthang,
Committee Member
- Thugen chawm : Pro-Pastor Thanglalgin
- Group Song : New Lamka Bial
- Solo : Sharonphai Bial
- Short Play : Imphal Bial (15Min.)

**14th MARCH, 2021 PATHIANN
DEVOTION & BIAKNA KIKHAWP**

6:00 AM : DEVOTION

- Puitu : Pro. Pastor H. Lamthianmuan
- 11:00 AM : BIAKNA KIKHAWP**

- Puitu : Pu Thangginlun,
Asst. Leader
- Pantu : Leijangphai Bial
- Lapawl : 1. D. Phailian Bial
2. Lamka Bial
3. Manipur Area Choir
- Thugentu : Rev. R. Lalhmingsanga, AS

**KIKHAWP PEL
FELLOWSHIP PROGRAMME**

- Puitu : Tv. Nekginson
Committee Member
-

Thugen chawm : Pro-Pastor Lallunglian
Solo : Leilon Bial
Pakna Lâm : S. Kawtlian Bial
Short Play : Dumlian Bial (15 Min.)

**6:00 PM 14th MARCH 2021 (PATHIANNI)
BIAKNA KIKHAWP**

Puitu : Pu Mangzalun,
Finance Secretary
Lapawl : 1. Leijangphai Bial
2. Kangvai Bial
3. Manipur Area Choir
Thugentu : Rev. Ngurthanmawia,
i/c Imphal Pastor Bial

**KIKHAWP PEL
FELLOWSHIP PROGRAMME**

Puitu : Pu T. Zuan, Treasurer
Thugenchawm : Pro-Pastor Khuplemlal
Solo : 1. Panglian Bial
: 2. Phailianbung Bial
Male Voice : D. Khawzim Bial
Short Play : D. Phailian Bial (15Min.)

HIAT DING AH PAWIMAW

- Vaihawm Kikhawp sung ah La puitu dingin Manipur Area Choir-te guat a hi'u.
 - Thilpiak lakkhawmna Pathianni Zingkal kikhawp leh zan kikhawp ah um in a.
 - Hipi ziak in I gam dinmun hiatthiam a haksa Prgramme kisiam hi, sandanglam a pawimaw chun san danglam hi ding a hi.
-

KHANGLAI LEH KAWPPI HAWL DING DANTE

-Rev. Dr. Hangpi Manlun
Executive Secretary, Zou Synod

1. Thumapui:

Insa ding inle i sak masang un, thil bangkim gel tupsa diam a i kawilo leh a laklaw laitak ah buai ding i hi'u . Ziagual ah chun, mihing khat a piang i hileh zi/pawsal nei hun tak le i nei ding chu Pathian in ei siamna ziak leh i um ding dan uh mawng mawng le a hi. Ahinla, khenkhatte chu val talua'n zi/pasal neikuan a gam leh lei ban hawl mai, Khristmas bawng haw ding tina vang ahi sam puai. Upa-te'n, "Gam giak thing chawm ah chawm ding ahi pua'i" a tiu a. Pawsal khat le zi muzo ma ma lo, "A pa kiang ah, pa ka zi nei ni dingi fix phawt mai hiti, i muzawlo leh lah postpone nadi kawm" ti tawp kit.

Zi-le-pawsal nei ding i hile chu Pathian kiang ah i dawt zing ding uh a hi. Thupil in,"A bul pat dik chu a kimkhat zawsa a hi" a ti gual in. Chuleh, tulai a thil lamdang ma ma a kigen ahileh lei chung dan a lekhathiam leh pil ma ma tam takte ziang inle Pathian panglo a zi/pawsal a hawl tak ua le a bawlkhial sek u'i. Dr. Billy Graham kiang a min Khristian Inkuan chu bang hun a pat ding a hem, tia a dawt uh chun a man, "Zi/pawsal nei masang kum thum vela pat ding" a ti ahi. Ziak a chun, i damsunga

kawppi ding i hawl ding phat le pilvang taka i hawl ding uh a hi. Chuleh, Zi/pawsal a kihawldan chuam chuamte gen masa ding i hi'u.

2. I pi-le-pute'n a la hawl dan uh:

Masanglai zi-le-cha ding, mo dingte ala hawl tak ua le ei uh lawi sangin ala pilvang zaw u'i. A tangpi in neinu/neipa ala hawl masa sek ui. Ziabana chun, a tena uh chu mi taima ahi nam, midamthei/khansau mi ahi nau em, insak/inthang tawh

a kituak nau em, mi lungthim hawi a hinau em (a thiang nau em) mi lepchia leh khutthem nei mi kitite leh a dang dangte in a la suichian hawi mama sek uh a hi. Tulai, ei lawi face-book, khawmpi/conference a kimu zual a kicheng maite tawh a kikhia ma ma u'i.

3. Leichung mite a kihawl dan uh:

A tangpi in mi melhawite, sum haute, sepna hawi neite, inmun, lo leh gam neite, mi minthangte leh a dang dangte tena in a na nei uh a hi. Zia gual ah kihawlte chu a det tak tak thei sek puau. Nidanglai in, pawsal khatin numei khat a law (pay) tam ziakin zi ding in ala nei a, ahin a mel a puam ah a lungkimzo pua. Tichun, "Lawinu, bangzat maw la law?" ti'n a dawng zing hi a tiu a hi. Chun, pawsal khat in nungak melsedeu mai khat a la sak thiam ziakin a kichenpi mai a, ahin, a mel ah a lungkim thei tak tak pua, "Zingkal hi henla zan hileh las sa aw" ti'n a nupan un la a kisak sak sek u'i, a kiti hi. Zia gual ah kicheng leh kihawlte chule a dik pen a hi pua'i.

4. Bible in Zi mu chu thilpha mu ahi a tilai in a neikhialte chu damsung su angkul tanna ahi mai hi:

Bible in Zi mu chu thilpha mu ahi a ti hi. Ama chu Ruby suangmantam sangin a mantam/thupi zaw'i a tia. Alangkhat lam a zi hawilo mu chu thilphalo mu ahi kit hi. Socrates in, "Zi gilo la nei leh mipil (Philosopher) suak ding la hi" a tia. Bible ma in, Numei hansia tawh chenkawm sang in thalek ah cheng a phat zawk ding thu a gen hi. Zia ban ah, Bible in, pawsal chu numeite luchang (head) a ti lai in, tulai numeite chu a pawsalte ngawng (neck) in a pang ua, a pawsalteu hektu (driver) in a pang u'i. Khenkhatte vang vang chu a pawsalteu sung ah a thagau uh lut in, a pawsalteu controltu leh a pawsalteu thasang in a pauun, thu leh la a sai u'i. Zia gual, zi gilo la neilona ding in pilvangan la vaigei masang in. Tuanthu khat zia gual hin a kigen hi, pawsal khatin nungak khat va sukha hi ngei ding a hia, a pa chun a sukhapa kiangah chun kachanu la kichenpi lo leh

kum sawmni (20)-suangkul a ka hung khum ding a hi ti'n a gik tai. A kichenpi a, zankhat a pawsal chu lungkham takin ala zan chut ta, a zi chun a khatlaw a dawnga, bangtia zan chut ziang la hem ati leh a pawsal chun, "La pa'n kachanu la kichenpilo leh kum sawmni suangkul a ka hung khum a ti khan sawt kasa, tu'n kum sawmni leh thum (23)-bang a phata, zia laikhan, suangkul ah um kha ala telzaw mai leng tuhi kipawtta ding hia, bangtin a kizalen ta diam, tia lungkham a chu ka hi" a ti khum hi. Zi nei khial chu damsung suangkul ahi mai hi.

5. Ngaizawng nei chu سوالنا اهي em?

Khristian khanglaite lak a dawtna tam pen chu ahileh ngaizawng nei chu سوالنا اهي em, ti hi a hi. Pathian in mihingte kiangah thilpiak lopi tak a piak chu kihiptuana/kidawina a hi. Adam in Evi a muphat in "Zia zet hi chu atia a dawi/ahip" (Gen. 2:23) ti'n i mu'i. Zia chu pawngsan a sia ahi diak puan, ahin i matkhial tak le vang ahawi

puan, a sia tina a hi. Zia ziak a chun, pilvang tak ah mat a kul in a pawimawi ma ma'i. Chuleh, zi/pawsal nei hun i hilo chun ngaizawng neilo hi apha pen hi. Chun, Khristian taka ngaizawng i neitheilo ding leh neilo le hawi zaw ding hi. Ngaizawng tam tak nei le chun le zi/pawsal ding chu khat mai mai hibep a hin, vangsiatna ziaka la kichen nung ua sun (thisan) a hem, la kikhen khak ngallo ua le. Chuleh, a tangpi'n, kuama a first love tawh kicheng a tam pua'i. Ziakachun, lekha simlaite, sepna neilaite bangin i zillaite ei subuaitu ding ahi leh neilo ngamphawt a, i hina ding i tunphat leh nei mai chu hawipen ding hi.

Chuleh, Khristian khanglai i hi uh tawh kituak a Pathian lau kawm a kisukthiangtho ding a hi. Tulai TV leh Cinema haw vel ah kingaite um dan velpo copy guatlo ding a hi. Zia gual a i kivenzawlo ding leh ngaizawng neilo phawt ding a hi.

Ziaban ah, kichet theisak a ngaizawng bang kawp vello ding a hi. Stand

by a hem reserve bang nei a mite lak a kiphatna neilo ding, i nei tak leh le khat bep nei ding, ahiloleh a tawp a kival dawkthei ahi. Chuleh, chance mutamlo ding, mi lungthim sunathei dinga hinkhua matlo ding, banah, kichenglo nana chu kikiss ti hawchan le bawl keilo ding a hi. Ahilo leh aban kang sau thei hi.

6. Tuhin, (Bible) a Zi-le-cha hawl ding dan a gente ngaitua khawm hi tiu:

i) Pathian in a pan hi:

Pathian in khawvel leh a sung ah thilzosia a siam zaw in a en a hawi a sa ma ma a; ahin a thilsiamte lak ah a man hawilo tia a gen masak pen chu pawсал ama ngawn ah a um chu a hi. (Gen.2:18). Mr. Miltonin in, “Bible a Pathian in hawilo tia a gen masak pen chu pawсал ama ngawn a um ding ahi” ti a hi. Chuleh, Pathian in ami siam masakte kiang ah “Hung pung unla khawvel hung luadim un” ti’n a maljawl hi. (Gen.1:28). Ziakachun, kawppi hawitak nei a suan-leh-pak nei ding chu Pathian dawidan ahi ti a chian hi.

ii) Thawmhauna:

Judate Rabbi khat in, “Pawсал in a nakgu khat amatsua a kipat in a um mai mai theipua, zia gual ma chun numei le a umna ding mun a tun masang in a um mai mai thei thei diak puai” a a ti. Ziak a chun khatvei bek damsung a zi/pawсал dinga lungkhamlo ti chu mibatlona leh damtheilona jiaa ahi thei a, zia gual mite chu a kinlama Doctor kietsak pai ding ahi a vaigei masang in. Chuleh, America Council of Life Insurance te suidan in America gam a mi thawmhau pen pente chu College a zillaite ahiu a ti ahi.

Chuleh, i kawppi ding i ngaitak le, masanglai ah a la kigen, “Love is blind” (lungsiatna mithum ahi), ti hun ahi nawt puai. Hawitak a kichen masang a kihet chian masak ding ahi. A hilo leh i hung kichen tak le, lungsiatna mithum’ chu hung hak kelkul tho tho ding ahi, ka ginchak la bang puai, la hiti ding lam heleng hung kichenpi keilo ding hiven ti a kinung ngawtualona ding in.

Chuleh kawppi ding zi/
pawsal hawlte'n i hawlding
dan uh A genteu pawimaw tak
tak te vak enkhawm hi ti'u:

**a) Background. (Kipatna/
pianna)**

Zia Background
(Kipatna/pianna) kiti hin i
piandawnau, khanletna leh
suantute a etchian ding ahi.
Masang lai in i pu leh pate'n
le zia hi angai khawk ma mau
a, suantute apat mi tawh kituak
lo, damlona kikai sawnthei nei,
(T.B, khanchawm, thianglo,
tulai ah, HIV&AIDS etc.)
ngaituana tinglo leh a dang
dangte chu ala enchian un,
ala dang dak sek uh ahi. Ziate
chu tulai lungchang lam sui
(Psychologist) leh i chenna
mun, kim leh kiang ngaitua
mite'n (Environmentalists) le
a ngai khawk ma mau khat a
hi.

**b) Brain (Thuak/lungthim)
lam:**

Mihing taksa piting
tho ngal, ahin lungthim lam a
pitinglo leh hawilo leh thianglo
mi a tam hi. Milungthim kawi,
mi tawh kituaklo leh hawilo

le umthei a hin etchian ding a
hi. Zia gual suan leh pakte nei
kha chu vainung ah kisikna
tawp khawk tuntheina ahi.

c) Belief (Ginna) kibatpi:

Khanglai nungak/
tangval kawppi hawldingte'n
ahithei ham leh gindan
kibatpite ma kihawl ding a
hi. Zia ban ah, ginglomi neilo
hâm hâm guat ding a hi. Chun,
doctrine leh gindan kibanglo
talua mite a kicheng phat
ua le vainung ah buaina leh
kituaklona a tun thei hi. Actor
minthang tak Tom Cruise in, a
zi panite gel tawh a kikhenna
ziak chu a sakhua biak
(Scientology) diak hi'n a gen
a, tulai a lasa thiam Katy Perry
a pawsal tawh a kikhenna diak
chule a pawsal Hindu a hi diak
hi'n a gen hi. Zia beplo ah
chun, gindan kibatpilo sakhua
dang bête (Hindu, Muslim etc)
tite bang kichenpilo a hawi
diak hi. A diak a hileh Bible in,
"Ginglote tawh kituaklo takin
ngawngkawl bat khawm ki'u
in" a ti hi. (II.Kor.6:14).

Zia banah, a hithei
ham ham leh doctrine kibang

leh mipiangthakte ma hawl ding a hi. Chuleh, banggual tuk in hausa maleu khamthei bawl haw vang kichenpilo ham a hawi a, kichen nunga kisiampnat ding vang kineplo vanglak ding a hi. Zia gual mite kichenpina chu a hunlo a meithaina leh zi-le-chate a hunlo a sun ding tina ahi bep tai.

d) Bil (ear)-a suiding ahi:

Tulai kawppi ding i hawl tak ua le a melhawi leh duang tingte i en masau a. Ahin, i kawppi ding tak chu i bil ua hawl masak zawk ding ahi. Zia umzia chu ahileh ahin dan leh gamtat dan a hemite kiang a dawt chian masak ding tina ahi. A diak in kochuam puitute (Pastor leh Upa)-leh mi muan umte dawt a, a mau a lungkim nak uh leh bawl tangpi ding ahi. Ahin, palai gin umlo lamat khak leh ama a dinga ala kihei dai ding hi.

Ahin tulai nungak tangval khenkhatte chu zu mun, sa mun lakpo leh conference lak a khatvei kimu a kicheng ngal bang i tam ua, ziate chu a sawt dai thei ngai

puau. Tulai zan khat kicheng, kal khat kicheng tibang i gam in a buaipei natna khat ahi tai. Pastorte â dinga bang a buaium ma ma khat ahileh, ala kicheng ua, kochuam in thunnunna i bawl masang un, ala kikhen man kit tihaw la beilo a da um ma ma

iii) Beautiful/Handsome Melhawina:

Kawppi ding hawl ten zi leh pawsal i hawl ding phat ua leh Beautiful/Handsome melhoi in i pan ua, a hin a masa lam ah point pailite khi pawimaw masa ding a hi zawi. A chung ah i gensa Brain, belief, bil ah hawl ding i gente zaw tak leh zia Beautiful and Handsome a hin i lutsuk pan bep ding uh a hi. Chuleh kichen masang ah le mel leh puam ah lungkim ding ahi a chutilo leh kichen nung ah kimuda thei tho hi.

Chuleh, khenkhatte lah a hausak jiaq ahem leh a lathiam jiaq ahem a kichenpi mai ti bang le um thei, zia chule bawlllo dinga hawi a hi. Chuleh kawppi ding I ngaitua phatle, akul

leh pawimaw ma ma dangte chu:

7. Thip bik bek ah um ding a hi:

Adam in a zi ding a hawl lai in Pathian mai/ang sung ah thipbek in a ipmu ti I mu thei u'i. (Gen.2:21-24). Missionary Jim Elotin, "Lalpa dawina mun a ipmu (chawl)" a ti gual in. Pathian kiang ah theitawpsua in i zi ding/ pawsal ding thip bek in dawn in um leu hin a man i kul leh pawimaw he ma ma ahi ziak in a bun tak in hung pe ding a hi. Ei un, Pathian zai ngakzolo in i phelep lawp sek ui. Mikhat in khawvel ah mingak lak lak in Pathian ngak haksa kasa pen hi ati gual in, Ama jia i ngakzawlo phat leh i buailaw sek uh ahi. Chuleh i pauchapnau Pathian in chithum in ei dawnhu/sang zing a hi, (a). I ati piak pai pawl (2). Wait, ala ngak phawt in a ti.

8. Chuleh Zi/Pawsal dinga hawl dingte â ding;

i). La kikimpi hawl in:

(a) Kumthu ah- Numei pawsal nei hun a kigen tangpi chu kum 20-26 or 30 kikal deu ahi. Chuleh 26-35 or 40 kikalte a hi deu hi. A hin tulai a hin lekha simna ziak leh sepna ziak ah nei vaigei deu le a um ua a khawk diak talua sam puai. Hinlah kum a kihiat takluat tak leh buaina a tung thei a. Numei chu pawsal sang ah a upat zawk phat leh nu bawlin a bawl thei ah a upat tak luat phat leh a pa/ pu bawl in a bawlthei kit zel ui. Nupan chu lawi/gual bawl ah kibawl ding a hi. Nupan khat aji kum 10-chau a pawsal sang a upa zaw in a pawsal a gai/hil thei zel a, ging le a ginglel/ muangmaw thei zel hi.

(b) Thiamna pilna ah: Thiamna pilna ah le kikimthei leh hawi ma ma ding a hi. South India a mikhat in America ah Scientist Research Centre ah

Ph.D a zo a. Zi mawltak khat a nei kha, a man ni cheng in thil thak thak a mu dawk zel a, zia gual chun a thilthak mute a zi kiang ah agen zelsek a, a zi'n a ngaina helo in a ngaisak pua, ama thilthak mudawte tuni'n "I akpi awp tai aw, I vatawtno keuta" ti vel po in ala dawnhu zel hi. A ngaidan uh kibanglo talua ahi phat in a pawsal chu lungkham in a thi khawlaw mai hi, a kiti hi.

(c) Taksa letdan thu ah:

A tangpi in Pawsal chu numei sang a alet zawk ding chu duthusam a hi. Pawsal sang a numei alet zawk tak le a guk in musitna a nei nuam a, a pawsal in a hiatdaw phat le a zi sang a hatzaw leh thilbawl thei hi na suklat utnain, tha gum leh gumtat (violence) in suklat a gawjel hi. Zia beploh chun, numeite'n a pawsalteu chu

amau sanga thiamna, pilna sang zaw leh thilbawlthei hileu a ut zaw u'i.

9. Nam kibang hithei leh:

Nam Chuam talua leh pau leh ham kibanglo talua a kichen khak phat ua le a guk in buaina a tun law thei hi. Ahin zia gual a Nam chuam pawsal nei dingte'n i hiat ding a hi leh: (6.1). Amau hindan takun la hing theina diam? (6.2). A man hung dawih maleh a inkuanpите'n a hi diam uh? (6.3). A inkuanpите la lungsiat tak tak theina diam? (6.4). A pau leh ham uh leh a culture uh la zilpei in la thiam tak tak na diam? A diak in numei nam dang neite khun a pau a ham uh thiam ah a mat ngal uh khu thil hawi tak a hi.

*A bân sutzawp hi
ding a hi...*

KOCHUAM TEN OFFICE MAT PHATCHUAM THEI DAN

Manipur Area Office hi Presbytery, Bial leh Kochuam mal chu-leh Kochuam Numei Pawl leh Khristian Khanglai Pawl te hawn lawk tak ah i namat ua; Synod Office lam chia ngailo ah bangkim i kisukfel theina ding ua um a hi. **Training/Seminar leh Programme dang dang** i mang nuam ta, zia chu Tualsung Kochuam ahem, Bial ahem, Presbytery level hi ziang taleh le guanggal thei suak kei a hi. A bawl ding dan bailam takin vak genchian hitiu.

1. Administrative Secretary kiang ah ziakin i programme mat-nawp kha gen hi tin, resource person office lamin ei hung sawl piak un ti ah dawt mai ding a hi.
2. Resource person a hem speaker hi vang a min lam ah genlo a pha'i.
3. Office Staff a kidailo inle Administrative Secretary chun zia tawh kisai ah matchak ding dawl mi pawimaw leh mithiam chu hung hawlin a hung sawlpiak mai ding a hi.
4. Ziagual ah office la dawl ah resource person ahem, speaker a hem la namat a hi chun TA,DA chu Office lam in pe vek intin. A gawitu te chun a tun leh giakna leh kipakman te kha himai ding a hi.
5. Khristian Khanglai Pawl te â ding in Music Training bang, Kochuam Numei Pawl te â ding in Khristian Sungkuan Seminar bang, Sunday School Committee te â ding in Sunday School Zilasaktu Training. Ziagual zel a chun Bial leh Kochuam mal in a bawl thei vek hi.

Zia hi thuthak hung kisua a hi pua, kochuam ten Office i matthiam theina ding ua suklat deu ngai ah hiatna a um ziak ah hung kisua a hi.

Rev. S. Lama Vaiphei
Co-Ordinator

**REVIVAL SPEAKER-TE &
TEAM MEMBER-TE KILAT THAKNA
PROGRAMME**

A mun ~ Giliad Tlang, Kawnpu, Churachandpur

A hun ~ February 2, 2021 (Tuesday)

Thupi ~ Nun Fimkhur (Eph.5:15)

10:00 a.m.

Puitu : Upa D. Kapa

Thupi : Nun Fimkhur - Thianghlimna ah

Thupi Gentu : Rev. R. Lalhmingsanga

11:00 a.m. - 12:00 noon

DISCUSSION

Puitu : Rev. S. Khaikholam

1:00p.m.

Puitu : Upa Thangkholian

Thupi : Nun Fimkhur - Nitin Nunah

Thupi Gentu : Rev. S. Mangminthang

2:00 p.m. - 3:00 p.m.

DISCUSSION

Puitu : Rev. S. Lama Vaiphei

PRO. PASTOR-TE ORIENTATION PROGRAMME

A hun ~ February 3-5, 2021

A mun ~ Thangkai-Lungpau Hall, A/S Office

Resource Person dingte:

- | | |
|---------------------------------|------------------------------------|
| 1. Rev. K. Neihzial | 8. Rev. Lallarmawia, Manipur Synod |
| 2. Rev. R. Lalhmingsanga | 9. Rev. C. Lalrinliana |
| 3. Rev. Thangneipau | 10. Rev. S. Lama Vaiphei |
| 4. Rev. C. Lalgaihawma | 11. Rev. Lalremliana Colney |
| 5. Rev. K. Jama Vaiphei | 12. Rev. S. Khaikholam |
| 6. Rev. Malakia Lalnunfela | 13. Rev. Nicky Lalremmawia |
| 7. Rev. Vanmawia, Manipur Synod | 14. Pu Lalbiaklian Vaiphei |



Editor : Rev. S. Lama Vaiphei, Co-ordinator
Joint Editors : Rev. R. Lalmingsanga, A/S
 : Rev. K. Jama Vaiphei
 : Rev. Hesei Vaiphei
 : Rev. Th. Samuel Vaiphei
 : Upa Lalminsang
 : Upa S. Lalpi
 : Pi Hoilian, Secretary, CKNP
 : Upa Lalthuoisang, Secretary, CKKP
Business Manager : Pu Lalbiaklian, A/S Office.
 MPCPS Office D. Phailian
 P.O. Box 107 CCPur-795128 Manipur
 Phone No. +91 9089623251
 Email - mparea@gmail.com

Kum khat lak man : Rs. 100.00

A man pia nuam leh a la thak nuam ten Business Manager kianga hiatsak ding.

A SUNGAH THU UMTE

1. Editorial	01
2. SERMON	
a) Pilvang takah hin	02
b) Bible mang phachuam hitiu	04
c) Jochebed Pauchapna	10
d) Pilvang takah hinkhua mat a pawimaw'i	14
e) Thuak hat takin tai hitiu	19
3. KOCHUAM HUANG	22-23
4. KHANGLAI HUANG	24-26
a) Khanglai leh Kawppi hawl ding dante	27-34
5. Kochuamte'n Office mat phatchuam thei dan	35

Hinna Vâk ah thu kisua zosia hi Editor ngaidan a hi suak puai

HINNA VAK INTERNET

Hinna Vak hi Facebook leh Twitter ah le zui thei ahita, a zui nuamte a dingin
[-www.facebook.com/hinnavak](http://www.facebook.com/hinnavak)

PRINTED AT : MODERN OFFSET PRINTER

PAUCHAPNA HIAT DING

1. Kum thak 2021 ei pui galkaitu Pathian kiangin kipak thu gen hitiu.
2. Kum 2021 lawting tak ah I mat hûitung theina ding un pauchap hitiu.
3. KKP leh KNP Bial Conference leh Bial Khawmpi hung tung pai ta ding, pauchapna'n delzui hitiu.
4. Bial enkawtu Pastor leh Upate â dingin dawn hitiu.
5. Thiam zilna lam Sikul pha tak ah kai zawm a hi pai theina dingin dawn hitiu.
6. S. Munnuam Bial thak Pathian in ei pe kit ta kipak thu gen hitiu.

HINNA VÂK LATUTE KIANGAH HIATSAKNA

Kum 2021 galkai thei dingin i um tau ah, Lalpa lopina chang ta hen. Hinna Vâk latute hiat ding ah pawimaw khenkhat a hung kitaklang ah, a la bawzui chiat thei leuhin kipak um ma in a.

1. Kochuam a la dingte'n i lak ding zat leh a Fee chu February, 2021 sung ngei in Office lam ah saifel hileh.
2. A fee ba i um chun Kum 2021 February tha sung ahin piak fel ding a hi. A pelote chu hung kithawt zawm talo ding a hi.
3. Kum khat a lak man ₹100/- a hi zing nalai hi.